

ունկամբ, լոհցե թիկամբ», – «ծառայ, որ ոչ գիտիցե զկամս տեառն եւ արժան ինչ զանի գործիցե, արբցե զան սակաւ, իսկ որ գիտիցե եւ մեղիցե արբցե զան բազում», – «դառն է ծառ խրատու, իսկ պտուղ նորա քաղցր»... Խրատելու այդ գործիքն առանձնապէս պատրաստուում էր վարժապետների համար, եւ տեր Թողիկը՝ իր ունեցածը, որպէս պատմում էր, ընծայ էր ստացել իր վարժապետից, որպէս յիշատակ եւ որպէս նշան իր մեծաքայլ յառաջադիմութեան:

Պատիժների մէջ մինչեւ այսօր չեմ մոռացել մէկը, որը որքան ծիծաղելի, այնքան էլ սարսափելի էր: Աշակերտին կանգնեցնում էին ոտքի վրայ եւ երկու ձեռքով բռնել էին տալիս մի աղիւս կամ ահագին Այսմաւորքը: Նա ժամերով, հնդկական ֆակիրի նման, այդ ծանր գիրքը պետք է պահեր զլիսից բարձր, երկու ափերի մէջ: Թեւքերը յոգնում էին, ջղերը թուլանում էին, բայց այդ ոչինչ: Գլխաւոր տանջանքը նրանումն էր, որ յանցաւորը պետք է կանգնէր մէկ ոտքի վրայ. միւս ոտքը գետին դնելու համարձակութիւն չուներ: Սովորաբար ընտրում էին ձախ ոտքը, իսկ աջը պետք է վեր բարձրացած պահեր: Մի աշակերտ մտրակը ձեռին կանգնած էր նրա մօտ, հսկում էր այդ անտանելի մարմնամարզութեան վրայ: Երբ պատահում էր յանցաւորին ոտքը գետին դնել, նա իսկոյն մտրակով զարկում էր ոտին: Այդ սատանայական պատժին ես այն աստիճան սովորած էի, որ երկար կարողանում էի սագի նման մէկ ոտքի վրայ կանգնած մնալ:

Մեր դպրոցն ուներ իր ուրիշ խստութիւնները:

Վաղ-առաւօտեան պետք է դասատուն գայինք բոլորովին անօթի, առանց մի պատառ հաց անգամ բերան դնելու: Թէյի կամ սուրճի գործածութիւնը այն ժամանակ դեռ մեր երկրում մտած չէր: Իսկ եթէ մեր տներում գտնուած թանկից կամ մածունից նախաճաշիկ անէինք, դրա համար սաստիկ պատիժներ էին նշանակուած: Վարժապետն ասում էր. «կուշտ փորով չէ կարելի դաս սովորել, երբ մարդ մի բան ուտում է, խելքը պակասում է»: Եւ նա օրինակ էր բերում ճգնաւորներին, վարդապետներին, որոնք ոչինչ չէին ուտում, բայց իրանցից գրքեր էին շարադրում:

Յիշեալ պատոերը մենք կատարում էինք ամենայն ճշտութեամբ. գեղծումներ անել նրա դեմ անկարելի էր, որովհետեւ վարժապետը սատանայի պէս իմանում էր, երբ աշակերտը մի բան կերած էր լինում: Ահա ինչպէս էր իմանում. նախ քան ուսման սկստիլը, վարժապետը ո՛ր աշակերտի վրայ կասկած ուներ՝ սկսում էր նրա լեզուն քննել, որ տեսնէ, արդեօք նա իր ծովը լուծել էր, թէ ոչ: Յայտնի բան է, անստաղ մարդու լեզուն անելի սպիտակ գոյն է ունենում. նրա մակերեւոյթի վրայ ճերմակ փառ է նստած լինում. իսկ երբ